

四庫全書

集部

欽定四庫全書

集部

宋詩鈔卷九

詳校官中書臣賈鏌

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷九

內閣中書舍人吳之振編

梅堯臣宛陵詩鈔

韓欽聖問西洛牡丹之感

韓君問我洛陽花爭新較舊無窮已今年誇好方絕倫  
明年好更還相比君疑造化特著意果乃區區可羞耻  
嘗聞都邑有勝意既不鍾人必種此由是其中立品名

紅紫葉繁於色美萌芽始見長蒿菜氣焰旋看壓桃李  
乃知得地偶增異遂出羣葩號奇偉亦如廣陵多芍藥  
閭井荒殘無可齒淮山邃秀付草樹不產髦英產佳卉  
人於天地亦一物固與萬類同生死天意無私任自然  
損益推遷寧有彼彼盛此衰皆一時豈關覆燾為偏委  
呼兒持紙書此說為我緘之報韓子

初冬夜坐憶桐城山行

我昔吏桐鄉窮山使屢躡路險獨後來心危常自怯下

顧雲容容前溪未可涉半崖風颭然驚鳥爭墮葉脩蔓  
不知名丹寶坼在荑林端野鼠飛緣挽一何捷馬行聞  
虎氣豎耳鼻息歛遂投山家宿駭汗衣尚浹歸來撫童  
僕前事語妻妾吾妻常有言艱勤壯時業安慕終日閒  
笑媚看婦靨自是甘努力于今無所懾老大官雖暇失  
偶淚滿曉書之空自知城上鼓三疊

雪後資政侍郎西湖宴集偶書

潭心不凍處鴈鷺自相依積雪正無際因風忽起飛初

驚如避戈復下信忘機偶得從公飲聊書此景歸

元日

昔遇風雪時孤舟泊吳淞江潮未應浦盡雪坐相對行  
庖得海物鹹酸何瑣碎久作北州人食此欣已再是時  
值新歲慶拜乃唯內草率具盤餐約略施粉黛舉杯更  
獻酬各爾祝鮑背咀橘齒病酸目已驚老態豈意未幾  
年中路苦失配嘉辰衆所喜悲淚我何耐曩歡今已衰  
日月不可貸前視四十春空期此身在世事都厭聞讀

書未忍退過目雖已忘寧捨心久愛何當往京口竹里  
翦荒穢行歌樂暮節薪菽甘自刈

寄滁州歐陽永叔

昔讀韋公集固多滁州詞爛漫寫風土上下窮幽奇君  
今得此郡名與前人馳君才比江海浩浩觀無涯下筆  
猶高帆十幅美滿吹一舉一千里只在頃刻時尋常行  
舟艫傍岸撐牽疲有才苟如此但恨不勇為仲尼著春  
秋貶骨嘗苦咎後世各有史善惡亦不遺君能切體類

鏡照嫫與施直辭鬼膽懼微文姦魄悲不書兒女書不  
作風月詩惟有先王法好醜無使疑安求一時譽當期  
千載知此外有甘脆可以奉親慈山蔬采笋蕨野膳臘  
麋麋鱸膾古來美鳧鴈今且推夏果亦瑣細一一舊頗  
窺圓尖剝水實青紅摘林枝又足供宴樂聊與子所宜  
慎勿思北來我言非狂癡洗慮當以淨洗垢當以脂此  
語同飲食遠寄入君脾

樊推官勸子止酒



少年好飲酒飲酒人少過今既齒髮衰好飲飲不多每  
飲輒嘔泄安得六府和朝醒頭不舉屋室如盤渦取樂  
反得病衛生理則那予欲從此止但畏人譏訶樊子亦  
能勸苦口無所阿乃知止為是不止將如何

感春之際以病止酒水丘有簡云時雨乍晴物景  
鮮麗疑其未是止酒時因成短章奉答

東風固無迹何處見春歸土逐草心坼雨兼花片飛雖  
憐柔甲長只恐艷條稀君但惜晴景休言止酒非

答宋學士次道寄澄心堂紙百幅

寒溪浸楮春夜月敲冰舉簾勻割脂焙乾堅滑若鋪玉  
一幅百錢曾不疑江南老人有在者為予嘗說江南時  
李主用以藏秘府外人取次不得窺城破猶存數千幅  
致入本朝誰謂奇漫堆閒屋任塵土七十年來人不知  
而今制作已輕薄比於古紙誠堪嗤古紙精光肉理厚  
邇歲好事亦稍推五六年前五永叙贈予兩軸令寶之  
是時頗叙此本末遂號澄心堂紙詩我不善書心每愧

君又何此百幅遺重增吾報不敢拒且置縑箱何所為  
春寒

春晝自陰陰雲陰薄更深蝶寒方斂翅花冷不開心亞  
樹青帘動依山片雨臨未嘗辜景物多病不能尋

答韓三子華韓五持國韓六玉汝見贈述詩

聖人於詩言曾不專其中因事有所激因物興以通自  
下而磨上是之謂國風雅章及頌篇刺美亦道同不獨  
識鳥獸而為文字工屈原作離騷自哀其志窮憤世嫉

那意寄在草木蟲迺來道頗喪有作皆言空煙雲寫形  
象葩卉詠青紅人事極諛諂引古稱辯雄經營唯切偶  
榮利因被蒙遂使世人只曰一藝充以巧比戲奕以  
聲喻鳴桐嗟嗟一何陋甘用無言終然古有登歌緣辭  
合徵宮辭山士大夫不出於瞽矇予言無時輩難用猶  
鴛鴦雖唱誰能聽所遇輒瘖聾諸君前有贈愛我言過  
豐君家好兄弟響合如笙叢雖欲一一報強說恐非衷  
聊書類頑石不敢事磨礱

前以詩答韓三子華後得其簡因叙下情

前者報君詩妄說良有以昔予在京師多為人所詆短  
章然無工實未甘藝此因君有過褒聊且發憤悱何言  
敢為師乃是貴不韙平常遭口語攢集猶毒矢此論苟  
一出是非必蜂起偶爾道瘖聾多疑已竊指雖恃不欺  
衷恨未致速死安得二頃田歸耕曷為耻誰能事州郡  
鷄狗徒聒耳

汝州王待制以長篇勸予復飲酒因謝之

前因飲酒多乃若傷營衛嘔血踰數升幾乎成病肺上  
念父母老下念妻兒稚不死常抱病於身寧自貴樊子  
來勸我止酒良有謂公復遺我詩責我詞甚毅指以年  
齒衰非酒何養氣春飲景可樂夏飲暑可避秋飲心忘  
愁冬飲暖勝被醉歌人不怪醉言人不忘在酒功實多  
止酒酒何罪假如壽九十今子已半世不飲徒自苦未  
必止為利胡沮妄與真恐非達者意屈原吟澤畔方悟  
獨醒累子居今之時安免人病議是以告子勤子守亦

謬計我讀纔一過不覺顏起愧自茲願少飲但不使疾  
熾書此以謝公公言誠有味

洛陽牡丹

古來多貴色歿去定何歸清魄不應散艷花還所依紅  
樓金谷妓黃值洛川妃朱紫亦皆附可言人世稀

和歐陽永叔啼鳥十八韻

南方窮山多野鳥百種巧口乘春鳴深林參天不見日  
滿壑呼嘯誰識名但依音響得其字因與爾雅殊形聲

我昔曾有禽言詩粗究一二啼豪情苦竹岡頭泥滑滑  
君時最賞趣向精餘篇亦各有思致恨未與盡衆鳥評  
君今山郡日無事靜聽鳥語如交爭提壺相與來勸飲  
戴勝亦助能勸耕我念此鳥頗有益如欲使君勤以行  
勸耕幸且強職事勸飲亦冀無獨醒杜鵑蜀魄哭歸去  
小人懷土慎勿聽城頭春鳩自謂拙鵲巢輒處安得平  
高窠喬木美毛羽哢吭葉底無如鶯口中調簧定何益  
下啄蚯蚓孰曰清自餘多類不足數一一推本煩神靈



我居中土別無鳥老鴉鵲方縱橫教雛叫噪日羣集  
豈有勸酒花下傾願君切莫厭啼鳥啼鳥於君無所營

和王仲儀詠癭二十韻

汝水出山險汝民多病癭或如鷄精滿或若猿嘽並女  
慚高掩襟男大濶裁領飲水擬注壺吐詞伴有鯁樗里  
既已聞杜預亦不幸秦人號知囊吳瓠繫狗頸臙脗常  
佳願伶仃安及脰只欲仰問天無由俯窺井挾帶歲月  
淡冒犯風霜冷厭惡雖自知剖剖且誰肯不唯羞把鏡

仍亦愁弔影內燎煩羊羴外斲費針穎在木曰楠榴剗  
之可為皿此誠無所用既有何能辟音膨脝廁無首臙  
腫異臙頂難將面目施可與胎胞逞賢哉臨汝守世德  
調金鼎氓俗雖醜乖教今日脩整風土恐隨遷晨昏憂  
屢省儻欲便慈顏名城不難請

憶吳松江晚泊

念昔西歸時晚泊吳江口回堤遡清風淡月生古柳夕  
鳥獨遠來漁舟猶在後當時誰與同涕憶泉下婦

使者自隨州來知尹師魯寓止僧舍語其處物景  
甚詳因作詩以寄焉

驛使話漢東故人遷謫處所居雖非居有樹即嘉樹日  
膳或鷄犬時蔬多筍芋夜堂地結蟠畫戶鵲噪聚著書  
今未成愛靜已得趣予欲訪其人炎蒸未能去

憶將渡揚子江

月暈知天風舟人夜相語平明好挂帆白浪須出浦此  
身猶在吳歸夢預到楚今日念同來吾妻已為土

依韻和晏相公

微生守貧賤文字出肝膽一為清潁行物象頗所覽泊  
舟寒潭陰野興入秋茭因吟適情性稍欲到平淡苦辭  
未圓熟刺口劇菱芡方將挹溟海器小已斂滌廣流不  
拒細愧抱獨慊慊疲馬去軒時戀嘶芻秣減茲繼周南  
篇短撓寧及艦試知不自量感涕屢揮摻

途中寄上尚書晏相公二十韻

驚飈入林鴉亂飛舞空落葉相追隨秋權摧物不見跡

但使萬古生愁悲登山臨水昔感別身作旅人安得宜  
單舟匹婦更無婢朝食每愧婦親炊平生獨以文字樂  
曾未敢耻貧賤為官雖寸進實過分名姓已被賢者知  
疎愚生不謁豪貴守此退縮行將衰潁州相公秉道德  
一見不以論高卑久調元化費精力猶且未倦刪書詩  
唐之文章別蕪穢纖悉寧有差毫釐謂其耽學可與語  
便語淵奧祛佞疑浮言近意不歷口直欲海窟擊蛟螭  
再拜膝前荷勤誨垂索捆載歸忘饑解艇水驛無幾舍

新詩又遣牙兵持上言行李覽物景聊可與婦陳酒卮  
下言狂斐頗及古陶韋比格吾不私相公貴且事翰墨  
我輩豈得專遊嬉今將蒿芹薦俎豆定亦不以微薄遺  
當令有詠無巨細當因川陸舟車貽日對順流思疾置  
老蛟姦怯潛鱗鬚

奉和子華持國王汝來飲西軒

我誠官局冷終日事靡枯每耽古人書似與世俗濶同  
道三四人來過慰饑渴迭相陳語言曾未厭刀咀日中

將過哺留飯具麕羈薄酒既以斟不覺寒日沒愚妻方  
罷沐供飲愧倉卒凍婢昧煎和親調首忘髧每食各驚  
顧誰謂不黔突僮僕暖吾薪饑馬飽吾秣馬無歸嘶聲  
僕有顏色活安穩不知疲明缸仍為撥醉言實無次曾  
未窮本末諸君競相先出口論莫奪復云天地間此能  
有幾達我聞顏汗下恐後謗難過其間常有言但未見  
疵齧終當輕有若悔目已屢眈莫入反信哉羣玉林豈得  
依朽枿吾心為之然收舌如斷割寄音謝豪俊茲蘊只

主撮

依韻和持國新值西軒

開池臨廣衢崇崇十餘畝新軒稍偏北治圃亦西酉盎  
中植菡萏水不通升斗小桂未得地驗活徒指朽上乏  
幽禽啼下多穴蟻走樂苗雖無補欲比山中有澆灌同  
一時萌芽或先後松株不滿尺廊廟色已厚稟性久且  
堅物理豈無偶樓櫺仍未大散葉纔八九夏綠與冬青  
各各自為友吾軒還處西脩竹爾後取兩莫論是非但



可吟對酒

送韓八太祝歸京師求醫

少年潔而腴茸茸鎖有鬚冒熱跨馬去去去天王都借  
問去何謂就醫將疾驅客曰實誑我健壯其非夫敢告  
固不給但怪所見愚瘠者未必病病者未必癰天馬不  
著肉日走萬里途山熊豈無膏養體唯恐痛滯結在於  
內安得形肌膚厥貌雖美好厥疾勿須臾療之欲其漸  
熾之非愛軀此行不飲別安得持酒壺

同諸韓及孫曼叔晚遊西湖二首

晚日城頭落輕鞍  
巢下涼野蜂銜水沫舟子剝菱黃木  
老識秋氣徑幽聞草香幅巾聊去檢不作楚人狂

爍電未成雨涼風先入衣  
青天忽開影紅日尚餘暉  
蛺蝶作團起蜻蜓相戴飛  
嘲諢不覺夕跨馬月中歸

七月二十一夜聞韓玉汝宿城北馬鋪

暗樹秋風擺葉鳴  
桃枝竹潭冷逾清  
孤燈淡淡短亭客  
半夜蕭蕭聞雨聲

得曾鞏秀才所附滁州歐陽永叔書答意

客從淮上來往問故人  
信袖銜藤紙書題字遠已認  
既喜開其封固覺減吾吝  
新詩不作寄乃見子所慎  
向來能如今豈有得觀  
豐南方歲苦熟生蝗復饑  
饉憂心日自勞霜髮應滿  
鬢知予欲東歸曉夕目不  
瞬貧難久待乏薄祿藉霑  
潤雖為委吏冗亦自甘以  
進相望未得親終朝如抱  
疹

裴如晦自河陽至同韓玉汝謁之

朝聞單騎歸徑走至其第扣門童僕頑拒我色甚戾不  
顧遂登堂有馬堂下繫辨詐大呼卿稍應西屋際逡巡  
冠帶出青綬何曳曳有似縮殼龜藏頭非得計况與二  
三子交分久已締怨爾避客尤新還復新婿

鴨雛

春鴨日浮波羽冷難伏卵嘗因雛抱時託以鷄窠暖三  
旬殼既圻乳毛寒脰短雛寧辨其雛翅擁情欸欸一日  
向水涯所稟殊未斷泛然去中流雛呼心憲憲人之苟

異懷負義不足算有志在養毓勿論報德限

杜挺之贈端溪圓硯

雪壓古寺溪中有卧病客訪之語久清饑馬齧庭栢桠  
頭蠻溪硯其狀若圓璧指此欲為贈而將助吟席非意  
予敢貪既拒頗不憚大出楮中有素許當自擇強持慰  
勤心歸以示明戚哂曰豈其然為汲寒泉滌滌彼偽飾  
物紙乾見頑石清晨走髯奴無厭願求易拜賜遂如初  
明月懷吞蝕分鸛目瑩尚漬墨花碧詞答謂我愚悔

復料已逆明日未央朝執手笑啞啞

對雪憶往歲錢塘西湖訪林逋三首

昔乘野舸向湖上泊岸去尋高士初折竹壓籬曾礙過  
却穿松下到茅廬

旋燒枯栗衣猶濕去愛峰前有徑開日暮更寒歸欲懶  
無端撩亂入船來

樵童野犬迎人後山葛棠梨案酒時不畏尖風吹入牖  
更教牀畔覓鴟夷

寄題滁州醉翁亭

琅琊谷口泉分流，淥山翠使君愛。泉清每來泉上醉，醉  
纓濯潺湲。醉吟異憔悴，日暮使君歸。野老紛紛至，但留  
山鳥啼。與伴松間吹，借問結廬何。使君游息地，借問醉  
者何。使君閒適意，借問鑄者何。使君自為記，使君能若  
此。吾詩不言刺。

送張太博通判袁州

君非身尤謫，南州南方尚鬼。其俗媮蚺為鄰，虎為限。丹

茅苦竹溪幽幽邑人祠鬼拜古樹竹杯一仰來烹牛牛  
死鬻懼常不幸誰得禁止專鋤鉤借曰未信君且往民  
將語怪君聽不仰山頭有行舟

古鑑

古鑑得荒塚土花全未磨背菱尖尚在鼻獸角微訛月  
暗蝦蟆蝕塵昏魍魎過但令光彩發表裏是山河

戊子三月二十一日殤小女稱稱三首

生汝父母喜死汝父母傷我行豈有虧汝命何不長鵲



雖春滿窠蜂子夏滿房毒螫與惡噪所生遂飛揚理固  
不可詰泣淚向蒼蒼

蓓蕾樹上花瑩潔昔嬰女春風不長久吹落便歸土嬌  
愛命亦然蒼天不知苦慈母眼中血未乾同兩乳  
高廣五寸棺埋此千歲恨至愛割難斷剛性剝以鈍淚  
傷染衣班花惜落蒂嫩天地既許生生之何遽困

送施景仁太博提點江南坑冶

楚山豈無銅楚匠豈不工大鑪常乏鑄碧井那得充積

弊在鄉縣孰肯以利籠君今承詔行論民當得中苟能使之發亦莫取之窮此乃事可久山溪山自通

夜泊虹縣同施景仁太博河上納涼書事

與君愛清風移榻就明月月落見星繁星繁如晝熱露衣輕露墜響岸崩湍齧坐思都城時誰許脚不韞

淮雨

雨脚射淮鳴萬鏃跳點起漚魚亂目濕帆遠來未收雲漏斜陽生半幅

雜詩絕句十七首

自此寶應道中  
起慶歷七年夏

蛙行動萍葉，悞觀作游魚。  
稍稍引兩股，已變科斗書。  
青草生水中，日日隨水長。  
水落何所依，撩亂為宿莽。  
有蟲託斷葑，斷葑日夕流。  
不知止息處，隨天非自由。  
荒水浸籬根，籬上蜻蛚立。  
魚網挂遠籬，野般籬外入。  
茸茸翦熟絲，雨染燕脂暈。  
滿樹斂黃昏，槿花無此分。  
青青老鏡葉，下有繁實尖。  
浪頭撥船女，刺手終不嫌。  
岸傍草樹密，往往不知名。  
其間有啼鳥，似與船相迎。

青蠅何處來聚集滿盤間誰知腹中物變化如循環  
水上賣瓜女摘瓜陂上田長麻已不識滿把青銅錢  
買魚問水客始得鯽與魴操刀欲割鱗跳怒鬐鬣張  
沙頭風雨來帖水野雲黑如觀曹公營萬弩射船側  
前時雙鴛鴦失雌鳴不已今更作雙來還悲舊流水  
度水紅蜻蜓傍人飛欸欸但知隨船輕不知船去遠  
塘上挽船人塘泥淡及脰落日望前村心將道途競  
燕立茅屋脊燕銜芹岸泥巢成同養子薄暮亦同棲

鵲銜高樹蟬危脇綠車響露腹不曾肥殺之嗟已枉  
河畔有釣翁團泥為甕缶坐想秦人聲思傾杜陵酒

褐山磯上港中泊

風惡舟難進聊依浦裏村岸潮生蓼節灘浪聚蘆根日  
脚看看雨江心漸漸昏篙師知蟹窟取以助清樽

別後寄永叔

前日辭親淚又為別友出愁極反無言欲言詞已窒荷  
公知我詩數數形美述茲道日未堙可與古為匹孟盧

張賈流其言不相昵或多窮苦語或特事豪逸而於韓公門取之不一律乃欲存此心欲使名譽溢竊比於老郊溪愧言過實然於世道中固且異謗嫉交情有若此始可論膠漆

宿邵埭聞雨因買藕災人迴呈永叔

秋雨雁來急夜舟人未眠亂風燈不定暝色樹相連寒屋猛添響濕窓愁打穿明朝持藕使書此寄公前

寄許主客

昨日山光寺前雨今朝邵伯堰頭風  
野雲不散低侵水魚艇無依尚蓋蓬  
藕味初能消酒渴蓼芳猶愛照波紅  
揚州有使急迴去敢此寄聲非塞鴻

岸貧

無能事耕穫亦不有鷄豚燒蚌燠  
槎沫織蓑依樹根野蘆編作室青  
蘆與為門稚子將荷葉還充犢鼻裋

村豪

日擊收田鼓時稱大有年爛傾新釀  
酒包載下江船女

髻銀釵滿童袍毳氍毹鮮里胥休借問不信有官權

寄酬發運許主客

淮上秋來物意閒又乘輕舸信帆還一浮一沒水中鳥  
更遠更昏天外山斜幅纏跨兵吏至濃金洒紙領珠頒  
欲酬已覺不能敵盡日臨風思自慙

淮陰

青環瘦鐵纜繫在淮陰城水脰多長短林枝有直橫山  
雙一足走妖鳥九頭鳴韓信祠堂古誰將跨下平



田家屋上壺

脩蔓屋頭綴大壺  
簷外垂霜乾葉猶苦  
風斷根未移收  
挂煙突近開充酒具  
避賤生無所用  
會有千金時

小村

淮濶洲多忽有村  
棘籬疎敗漫為門  
寒雞得食自呼伴  
老叟無衣猶抱孫  
野艇鳥翹唯斷纜  
枯桑水齧只危根  
嗟哉生計一如此  
謬入王民版籍論

泊下黃溪

黃溪晚來泊得見田家微刺艇斜陽下耕洲載耒歸牛  
鳴向罕犢犬喜入人衣復有返樵者檐枯翹雉肥

聞進士販茶

自此宣州至和  
二年五月後

山園茶盛四五月江南竊販如豺狼頑凶少壯冒嶺險  
夜行作隊如刀槍浮浪書生亦貪利吏筭經箱為盜囊  
津頭吏卒雖捕獲官司直惜儒衣裳却來城中談孔孟  
言語便欲非克湯三日夏雨刺昏墊五日炎熱譏旱傷  
百端得錢事酒肉屋裏餓婦無糒糧一身溝壑乃自取

將相賢科何爾當

梅雨

三日雨不止蚯蚓上我堂  
濕茵生枯籬潤氣醖素裳  
東池蝦蟆兒無限相跳梁  
野草侵花圃忽與欄干長  
門前無車馬苔色何蒼蒼  
屋後昭亭山又被雲蔽藏  
四向不可往靜坐唯一牀  
寂然忘外慮微誦黃庭章  
妻子笑我閒曷不自舉觴  
已勝伯倫婦一醉猶在傍

汴渠

我實山野人不識經濟宜聞歌汴渠勞漫綴汴渠詩汴  
水源本清隨分黃河枝濁流方已盛清派不可推天王  
居大梁龍舉雲必隨設無通舟航百貨當陸馳人肩牛  
騾驢定應無完皮苟欲東南蘇要省聚斂為兵衛詎能  
削乃須雄京師今來雖太平盡罷未是時願循祖宗規  
勿益羣息之譬竭兩川賦豈由此水施縱有三峽下率  
皆麓冗資慎莫尤汴渠非渠取膏脂

答宣城張主簿遺鴉山茶次其韻

昔觀唐人詩茶詠鴉山嘉鴉銜茶子生遂同山名鴉重  
以初槍旗采之穿煙霞江南雖盛產處處無此茶纖嫩  
如雀舌煎烹比露芽競收青蒨焙不重漉酒紗顧渚亦  
頗近蒙頂來以遐雙井鷹掇爪建溪春剝葩日鑄弄香  
美天目猶稻麻吳人與越人各各相鬪夸傳買費金帛  
愛貪無夷華甘苦不一致精麤還有差至珍非貴多為  
贈勿言些如何煩縣僚忽遺及我家雪貯雙砂甕詩琢  
無玉瑕文字搜怪奇難於抱長蛇明珠滿紙上剝畜不

為奢玩久手生胝窺久眼生花嘗聞茗消肉應亦可破  
瘕飲啜氣覺清賞重歎復嗟嗟既不足吟誦又豈加  
我今實強為君莫笑我耶

依韻和永叔澄心堂紙答劉原甫

退之昔負天下才掃掩衆說猶除埃張籍盧同鬪新怪  
最稱東野為奇瑰當時辭人固不少漫費紙札磨松煤  
歐陽令與韓相似海水浩浩山崑崙石君蘇君比盧籍  
以我待郊嗟困摧公之此心實扶助更復有力誰論哉

禁林晚入接俊彥一出古紙還相哀曼卿子美人不識  
昔嘗吟唱同樽壘因之作詩答原甫文字駛穩如刀裁  
怪其有紙不寄我如此出語亦善談往年公贈兩大軸  
于今愛惜不輒開是時有詩述本末值公再入居蘭臺  
崇文庫書作總目未暇綴韻酬草萊前者京師競分買  
罄竭舊府歸鄒枚自慚把筆粗成字安可遠與鍾王陪  
丈高墨妙公第一宜用此紙傳將來

夢後寄歐陽永叔

不趁常叅久安眠向舊溪五更千里夢殘月一城鷄適  
往言猶是浮生理可齊山王今已貴肯聽竹禽啼

送方進士遊廬山

長風沙浪屋許大羅刹石齒水下排歷此二險過湓浦  
始見瀑布懸蒼崖繫舟上岸入松徑三日踏穿新蠟鞋  
路盤溪谷出嶺望後山日照前山霧偶逢風雨恐衣濕  
側倚石脇人相乖雨收不覺在高處却見童僕提攜偕  
水聲不絕鳥聲好藥草香氣侵人懷老僧避俗去足跣



野客就澗開門闕樹品隱映見寺刹層層沓沓躋雲階  
塢田將獲鳥雀橫秋果正熟猴猿蘇東林淡蘆應似舊  
唯此足以待爾儕子心洒落撒然我方塵垢難磨揩

穎公遺碧霄峰茗

到山春已晚何更有新茶峰頂應多雨天寒始發芽採  
時林狹靜蒸處石泉嘉持作衣囊祕分來五柳家

黃鶯

內家初上翠微宮樹裏窺人在半空笑語漸高無約束

侍臣偷望向雲中

西鄰少年今出遊東家女兒未識羞  
門前烏臼葉已暗日暮問誰牆上頭

李仲求寄建溪洪井茶七品云愈少愈佳未知嘗  
何如耳因條而答之

忽有西山使始遺七品茶末品無水暈六品無沉祖五  
品散雲脚四品浮粟花三品若瓊乳二品罕所加絕品  
不可議甘香焉等差一日嘗一甌六腑無昏邪夜枕不

得寐月樹聞啼鴉憂來唯覺衰可驗唯齒牙動搖有三  
四妨咀連左車髮亦足驚疎疎點霜華乃思平生游  
但恨江路賒安得一見之煮泉相與誇

春日拜壠經田家

田家春作日日近丹杏破顰場圃頭南嶺禽過北嶺叫  
高田水入低田流桑牙將綻霧露裊蠶子未浴箱筐收  
令我還朝固不遠紫宸已夢瞻珠旒

重送楊明叔

并序

行而有以贖者助所不足也車馬子有裘服子有貨  
具子有所可贈者詩言爾故先為七言以送將以道  
彼美而樂乎往也子不為重邀予以規又作五言應  
其請

君將會稽去舊蹟可以嬉予因狀其美贈子臨路岐子  
不以為樂但願有以規噫吾豈無說畏子未及禪既求  
不語子吾曷忍子欺前年子渡淮夜泊洪澤湄有鬼稱  
使者來告風波期子時再拜謝乃被隣船嗤逡巡鬼復

至復附船家兒怒彼慢嗤士明當使驚危船兒傍舷迴  
走若一足變翌日各解舟出浦風動旗子獨乘安流彼  
受橫浪吹此事非子傳焉得他人知昨逢令弟蘊備述  
果不疑越俗素重鬼慎勿啟其私子口有仁義子腹有  
書詩子嘗談王道怪語固未宜近聞蘇才翁問子辟者  
誰得非外戚侯子怒已豎眉令我倘得罪甘與蘇同之  
過淮

侍親數數來浮汴護櫬迢迢復渡淮旨蓄曾無御寒具

細君唯有隱居釵月痕遠入魚銜浪潮退長汀蚌閣崖  
素服華顛色相似青銅不忍見形骸

發長蘆江口

篙師施工相整衣龍女廟中來宰豨野祝擊鼓降神語  
老鴉銜肉上樹飛長江無風平似削兩櫓夾舸行將歸  
南國山川都不改傷心慈姥舊時磯

龍女祠祈順風

龍母龍相依風雲隨所變舟人請予往出廟旗腳轉旗

指西南歸飛帆疾流電長蘆江口發平明白鷺洲前已  
朝膳竹根盃琰不欺人世間然諾空當面

早發大信口

犬吠知船解村墟尚閉門霜泥粘纜尾水水閣潮痕撇  
撇鷓鴣去纖纖舴艋昏梅湖到不遠寄信向田園

依韻和正仲寄酒因戲之

上字黃封誰可識偷傳王氏法應真清淮始變醅猶薄  
句水新來味更醇欲擬比酥酥少色曾持勸客客何人

紅梅雖是吾家物老去無心一醉春

清淮酒本王九傳法於山陽

閒居

讀易忘饑倦東窗盡日開庭花昏自斂野蝶晝還來漫  
數過籬笋遙窺隔葉梅唯愁車馬入門外起塵埃

秋雨篇

秋雨一向不解休連昏接晨終窮秋梅生不量仰天問  
神官夜夢言語周日月是天之兩目忽然生翳無藥瘳  
只知淚滴為赤子赤子豈悟天公憂天公哭霽霽洒涕



落九州地祇不敢安泥濘已沒頭乃因從容詰神官后  
稷今在帝所不從前后稷知稼穡曾以筋力親田疇曷  
不告帝且輟泣九穀正熟容其收蚕時不泣此時泣憂  
民欲活反扼喉神官發怒髭奮虬下土小臣安預謀恐  
然驚覺汗交流樹上已聽呼雌鳩

聞永叔出守同州寄之

冕旒高拱元元上左右無非唯唯臣獨以至公持國法  
豈將孤直犯龍鱗茱萸欲把人留楚苜宿方枯馬入秦

訪古尋碑可銷日秋風原上足麒麟

送天台李令庭芝

吾聞天台久未見天台狀去海知幾里去天知幾丈峰  
嶺隱與出嵒壑背與向雲雷反在下泉瀑反在上幽溪  
無窮窺杳眇無窮望至險可慄慄至怪可駭喪石橋彎  
長弓跨絕絃未放當時白道猷平步入青嶂去為六百  
石亦見志所尚子欲廣異聞可以一尋訪

十一月十二日賽昭亭神

冷雨凝雪未成雪潭空魚寒歸石穴長篙扣穴倩鯉魚  
寄信山頭來真設魚傳水鳥飛上山山大槎槎乾吹咽  
旋灰起角巫鼓鳴漆俎銅盤顛牲血琵琶嘈嘈神降言  
福汝祐汝無灾孽西向啐飲東向迴溪心却望山崔嵬  
依韻和吳正仲冬至

流光冉冉即衰進物趣迴還似轉規長景已知今日至  
孤懷不比少年時偶陪上閣駕驚後且與南州父老期  
况有春禾新酒熟百分休放手中卮

依韻答吳正仲罷飲

君辭予家傾蟻醕自有嘉味須持來青篋絡餅方出戶  
紅粧侑席已邀杯窮愁一飲猶闕分側望羣賢不可陪  
靜坐紙窗無所得只將文字眼前堆

依韻諸公尋靈濟重臺梅

梅要山傍水次栽非同弱柳近章臺重重葉葉花依舊  
歲歲年年客又來雖愛千枝競繁密還嗟短髮已衰頽  
郎官博士留車騎擁蔽脩篁為斫開

和正仲再和罷飲

吳味期君強飲開楚醕因我破愁來何言合美將虛館  
却憶爭妍就捧杯夜霰已先庭雪集單衣難與毳裘陪  
踐盟幾欲驅車去塵事無端日日堆

和韻三和戲示

笊箸畫蛤瓦缸醕海若淮壩各寄來將學時人鬪牛飲  
還從上客舞娥杯蓬蒿自有蔣生樂珠翠寧容鄭氏陪  
莫計寒暄與風雪古來黃土北邙堆

鄭康成與廬子幹  
同事馬融融後堂

有珠翠之會康  
咸不得預焉

依韻四和正仲

四和還如九醞醕更醇更美未嫌來相逢莫作兩般眼  
一飲不辭三百杯嵇阮當時無俗慮山王雖貴亦能陪  
如今世態尤堪薄只把官資滿眼堆

袁招飲鄭云自旦  
至暮三百餘杯

依韻和吳正仲聞重梅已開見招

難開密葉不因寒誰翦鵝兒短羽攢猶是去年驚目艷  
不知從此幾人觀重重好藥重重惜日日攀枝日日殘

我為病衰方止酒願攜茶具作清歡

朝

木鐸初開水上城竹籬深閉日光生青苔井畔雀兒鬬  
烏臼樹頭鴉舅鳴世事但知開口笑俗情休要著心行  
是非不道任挑撻唯憶當時阮步兵

東溪

行到東溪看水時坐臨孤嶼發船遲野鳬眠岸有閒意  
老樹著花無醜枝短短蒲茸齊似翦平平沙石淨於篩

情雖不厭住不得薄暮歸來車馬疲

送吳正仲婺倅歸梅谿待闕

山水東陽去未去朋親茗雪朝復朝更無越相逃名舸  
猶看吳王送女潮海燕歸齊聲滿屋谿梅開過子生條  
明年十月吏迎處七里灘前棹奏簫

志來上人寄示酴醾花并壓埽茶有感

京都三月酴醾開高架交垂自為洞素葉層層紫蕊香  
釀歸光祿春生甕東陌西池走鈿車芳林廣圃飛朱鞵



二年不到大梁城江邊淚滴肝腸痛況茲齒髮漸衰老  
已是憂愁不如衆宣城北寺來上人獨有一叢盤嫩龔  
去歲游吳求不得今朝還喜自持送眼底雖同往日看  
樽前所憶皆成夢又置新茶采雨前烏觜壓塲雲色弄  
對花却酒煮香泉強詠才慚非白鳳

次韻和吳季野題岳上人澄心亭

空山舊逕綠苔滿古寺齋盂白薤蒸暑雨坐中飛漠漠  
野泉林外落層層從來勝絕皆離俗未有幽溪不屬僧

唯愛溪頭一尋水莫聞流浪莫聞澄

答宣闥司理

六經義趣深傳訓或得失後人語雖淺辨識猶百一歐  
陽最知我初時且尚室比以為橄欖迴甘始稱逆老於  
文學人尚不即究悉宜乎與世士橫爾遭詬唧誓將默  
無言負暄方抱膝非非孰是是都莫答問詰歲暮宣叅  
軍辭如鮑昭逸粲然傾明珠褒我頗過實便言楚江萍  
光彩侔旭日自慚流浪蹤不得蒿芹匹復為苦硬句酬

報強把筆

依韻和丁元珍見寄

我從江南來挂席江上正輕舟自行速不與風力競乃  
省少時學勉強無佳興初如弄機杼未解布絲經利器  
昧其持或反授人柄及親賢豪游所尚志已定不厭朝  
市喧不須山林靜不為煦煦妍不為巖巖永遇物理自  
暢區處劇操令仍類楚野筠忽從孤根迸便成翠琅玕  
久與風霜硬雖然達吾真誰復究畢竟世間忘坦途盡

欲求密徑哂我是鹿疎宜乎今蹭蹬蹭蹬誠可嗟所偶  
亦已併晚逢二三友喜飲恨多病道路何遄迴季秋越  
春孟平生景慕者邂逅出天幸接迹猶謂榮況此聲顏  
並實慚寡時用又顧無奇行愛之不忍去自旦還至暝  
在昔濁世賢徒知清酒聖但用醉為娛一老少不更稍  
思桃源人翩爾乘漁艇尋花逐水往豈念衰與盛歌謳  
非俗情山響自答應以此謝君勤微言期略聽袞袞不  
足為試共幽人評

泰州王學士寄車螯蛤蜊

車螯與月蛤寄自海陵郡謂我抱餘醒江都多美醞老  
來飲不滿一醉已闌分甘鮮雖所嗜易飫亦莫問嬌女  
巧收殼燕脂合眉暈貧奩無金玉狼籍生恚忿妻孥喜  
食之婢妾困埽拼行當至京華耳目飽塵坌此味爽口  
難書為厭者訓

依韻和孫都官河上寫望

河上風烟愛此邦吳艘越舸不相降魚鯉蠢蠢橋邊市

花暗淡淡竹裏窗蹴踘漸知寒食近鞦韆將立小鬟雙  
年光取次須偷賞何用功名節與幢

依韻和許待制偶書

曉雨射船珠瀉盤平明水上舞英殘鬬鷄蹠惡輕泥濕  
調馬蹄翻軟土乾淡屋鷺巢將欲補密房蠶蟻尚憂寒  
為言楚客甘蔬軟白芷香牙長嫩珊

依韻和春日偶書

貌面春醅壓嫩藍盤中鵝炙亦肥甘正宜醉夢輕為蝶

苦怕酬詩密似蠶病起羊公方隱几歸來陶令只乘籃  
河堤古木欣欣暗野水新秧拍拍渰已向官資隨分足  
莫將忠憤等閒談況於世上諸般厭不作人間一例貪  
陋巷自知當退縮權門誰解更趨叅高低趣向難為合  
冷暖情懷固飽諳勉意妻兒猶苟祿強顏冠冕未抽簪  
唯公思遇留連召頻對樽罍也負慚

依韻和禁烟近事之什

狂風暴雨已頻過近水棠梨著未多窈窕踏歌相把袂

輕浮賭勝各飛塢閒牽白日游絲颺細驀黃金舞帶拖  
小苑芳菲花鬪藥華堂嘲哢驚爭窠西州駿馬頭如剝  
南國佳人頸似瑳結客追隨傾畫榼分明游樂藉青莎  
鞦韆競打遺細翠芍藥將開翦纈羅我病乞求新火炙  
無心更聽竹枝歌

觀邵不疑學士所藏名書古畫

野性好書畫無力能自致每遇高趣人常許出以視邵  
侯多奇玩留我特開筭首觀阮與杜驢上瞑目醉

阮籍  
杜甫



韓幹貌四馬臨流解鞍轡花驄照夜白正側各畜意繁  
衣穿袴靴坐立皆殿吏精神宛如生于腮復穿鼻梅鷄  
徐熙花竹間寒雀睡逸少自寫真對鏡絕相類數本失  
姓名古胡并老驥山水樹石硬荆關藝能至荆關巨然  
李成者落筆愈奇異人物張僧繇雖傳恐非是其餘又  
莫究摸搭似未備周秦以來書行草楷篆隸聲名舊烜  
赫一一果可喜邵侯愛我曹咸使紙尾記况侯有古學  
小字刻珉翠各贈墨本歸懷寶誰肯忌

將赴表臣會呈杜挺之

莫怪去遲遲予心君亦知膝前嬌小女眼底寧馨兒學  
語渠渠問牽裳步步隨出門雖不遠情愛未能移

高車再過謝永叔內翰

世人重貴不重舊重舊今在歐陽公昨朝喜我都門入  
高車臨岸進船蓬俯躬拜我禮愈下騶徒竊語音微通  
我公聲名壓朝右何厚於此瘦老翁笑言啞啞似平昔  
妻子信說如梁鴻自茲連雨泥沒脰未得謁帝明光宮

冒陰履濕就稅地親賓未過知巷窮復聞傳呼公又至  
黃金絡馬聲瓏瓏紫袍寶帶照屋室飲水啜茗當清風  
邀以新詩出古律霜髯屢領搖寒松因嗟近代貴莫比  
官為司空仍侍中今成家丘已寂寞文字豈得留無窮  
以此易彼可勿媿浮榮有若送雨虹須臾斷滅不復見  
唯有明月常當空況我學不為買祿直欲到死攀軻雄  
一飯足以飽我腹一衣足以飾我躬老雖得職不足顯  
願與公去驩樂同驩樂同治園田潁水東

李審言相招與刁景純周仲章裴如晦馮當世沈  
文通謝師厚師直會開寶塔院

自君命我飲朝暮雨傾瓦城東與城北大道泥沒馬敢  
忘主人勤顛撲困馭者衆客亦如期陳肴藉蘭若馮裴  
與沈謝辯論過終賈刁周事老成危坐言語寡酒半時  
謔劇揣狀類模寫或譏項髮禿或指舌端俊或將冠帶  
針勸作梁武捨謂我大耳兒此實已見假又効井市態  
屈強體非雅順風手沙沙逆風口哆哆竟席屢絕倒去

忌肝膽瀉規規豈無儕達識高天下

陸子履見過

劉郎謫去十年歸長樂鐘聲下太微屈指故人無曩日  
平明騎馬扣吾扉論情論舊彈冠少多病多愁飲酒稀  
猶喜醉翁時一見攀炎附熱莫相譏

重送周都官

水上朱樓畫角鳴濛濛雨裏榜舟輕未逢甫里先生謁  
多見吳興太守迎荷葉半黃蓮子老霜苞微綠橘林明

十年不到風烟改君去將詩與畫評

送李戴之殿丞赴海州推務

瓜蔓水生風雨多吳船發棹唱吳歌  
槎從秋漢下應快人憶故園歸奈何  
世事靜思同轉轂物華催老劇飛梭  
茶官到有清閒味海月團團入酒罍

和吳冲卿學士石屏

吳夫子佩銀龜乘天馬素怪奇忽得號略一片石其中  
白色圓如規又有樹與鳥畫手雖妙何能為吳乃持問

歐陽公比公曩獲尤可疑疑不為辨賦以詩詩辭粲粲  
明星垂復遣齋來使我和坐上鉅分傍睨之范侯實有  
揚雄學成云此理難究推我歸滌慮反覆思義雖不經  
聊解頤月與太陽合朔時陽鳥飛上桂樹枝枝上作窠  
生羣兒人不知天公天公欲伴世間見影著石面如粘  
稿烏既不得去月亦不可移留為千古作好玩慎勿傾

樸同玉碑

時在唐書局與歐陽永叔王  
元叔范景仁會食得所示詩

送薛氏婦歸絳州

在家勗爾勤女功無不喜既嫁訓爾恭恭已乃遠耻我  
家本素風百事無有侈隨宜具奩箱不陋復不鄙當須  
記母言夜寐仍夙起慎勿窺窗戶慎勿輒笑毀妄非勿  
較競醜語勿辨理每順舅姑心況逆舅姑耳為婦若此  
能乃是儒家子看爾十九年門閭未嘗履一朝陟太行  
悲傷黃河水車徒望何處哭泣動隣里生女不如男天  
親反由彼

永叔請賦車螯



素唇紫錦背漿味壓蚶菜海客穿海沙拾貯寒潮退王  
都有美醞此物實當對相去三千里貴力致以配翰林  
文章宗炙鮮尤所愛旋圻旋沽飲酒船如落埭殊非北  
人宜肥羊噉羶塊

歐陽永叔王原叔二翰林韓子華吳長文二舍人

同過弊廬值出不及見

十二月  
七日

枯竹為門扉不可容車騎況如鄭廣文無羶藉賓位窮  
冬月破七貴客聯玉轡傳騶肅里閭下榻呼童稚問我

何所往共留牆上字兒愚不知誰金章言照地既出卿  
大夫恨莫親帚簪星躔回已高麟趾寧復至戢戢鄰巷  
居相見竊自喟豈料瘦老翁能令賢達至昔時蓬蒿徑  
安有此盛事

還吳長文舍人詩卷

松液化茯苓又因為琥珀遇物必得形毛髮曾不隔君  
子亦豹變其文蔚可覲个者逢吳侯滿腹貯經籍噴吐  
五色霓自堪垂典冊詩教始二南皆著賢聖跡後世竟

翦裁破碎隨刀尺我輩強追倣畫龍成蜥蜴有唐文最  
盛韓伏甫與白甫白無不包甄陶成所索侯初守二郡  
山水多助益升高觴嘉賓賦筆速鷹翻葺書成大軸許  
我觀琮璧真物固易辨恨無百金易借從懷袖歸誦玩  
廢朝夕譬如游國都愀怵失阡陌苦吟三十年所獲唯  
巾幘豈比夸受降甲齊熊耳積重見元和風珠玉敵海  
舶自慚寒餓為何張空避席

莫登樓

莫登樓脚力雖健勞雙眸下見紛紛馬與牛馬於鞍轡  
牛服辮露臺歌吹聲不休腰鼓百面紅臂構先打六么  
後梁州棚簾夾道多天柔鮮衣壯僕獐髭虬寶撾呵叱  
倚王侯夸妍鬪艷目已偷天寒酒醺誰爾侮倚檻心往  
形獨留有此光景無能游粉署深沉空翠幃青綾被冷  
風颼颼懷抱既如此何須望樓頭

依韻和永叔勸飲酒莫吟詩雜言

我生無所嗜唯嗜酒與詩一日舍此心腸悲名存貴大

不輒思甌空釜冷不俛眉妻孥凍餓數恚之但自吟醉  
與世違此外萬事皆莫知王公謁請衆去早既衰愈懶  
刎到遲日高倦僕顏色沮况騎瘦馬兩耳垂厭此勞苦  
不喜出唯有文字時能為諸公尚恐竭智慮勤勤勸飲  
莫我卑再拜受公言竊意公矯時只愛詩謂余癡

出省有日書事和永叔

辭家綵勝人為日歸路梨花雨合晴庭下鞦韆應未拆  
籠中鸚鵡即聞聲千門走馬將看勝廣市吹簫尚賣錫

已是瓊林芳卉晚不須游處避門生

上馬和公儀

煙火千門曉欲開五花驕馬肯徘徊井閭已是經時隔  
親舊全如遠別來帝闕重看多氣象天街新霽少塵埃  
振冠浣服無容久便見池門放榜催

和楚屯田同曾子固陸子履觀予堂前石榴花

堂下一匹鄭虔馬欄邊兩株安石榴但能有酒邀佳客  
亦任狂花落素甌俗女紅裙無好色主人白髮自侵頭

欲歌翠樹芳條曲已去洛陽三十秋

呂晉叔著作遺新茶

四葉及王游共家原坂嶺歲摘建溪春爭先取晴景大  
窠有壯液所發必奇穎一朝團焙成價與黃金逞呂侯  
得鄉人分贈我已幸其贈幾何多六色十五餅每餅包  
青弱紅籤纏素榮屑之雲雪輕吸已神魄惺會待嘉客  
來侑談當畫永

送畢甥之臨邛主簿雜言

自我歷官三十年有脚未曾行蜀川李白嘗言道之艱  
險長嗟難劇上青天烏悲猿嚎馬蹄脫苔梯雨棧愁傾  
顛蒼崖下窺不見底但聽雷聲輓石懸湍濺曉盤青泥  
上高煙暮盤青泥到下泉劍閣如劍巉然割腸刺眼令  
古連爾去三千九百里巴山小馬烏皮韉一婦一奚行  
李單家具日貨能幾錢人皆畏避不敢往此獨敢往何  
所便況是初宦無遠適心意自許非由銓異乎哉我今  
送爾徒哀憐



送王介甫知毗陵

吳牛常畏熱吳田常畏枯有樹不陰犢有水不滋耨孰  
知事春農但知急秋租太守追縣官堂上怒奮鬚縣官  
促里長堂下鞭扑俱不體天子仁不恤黔首逋借問彼  
為政一一何所殊今君請郡去預喜民將蘇每觀二千  
石結束辭國都絲韉加錦緣銀勒以金塗兵吏擁後隊  
劍撾盛前驅君人不若此革轡障泥烏欵行問風俗低  
意騎更鴛下情靡不達略細舉其麤曾肯為衆異亦周

為世趨學詩聞已熟愛棠理豈無

永叔內翰遺李太博家新生鴨脚

北人見鴨脚南人見胡桃識內不識外疑若橡栗韜鴨  
脚類綠李其名因葉高吾鄉宣城郡每以此為勞種樹  
三十年結子防山獠剝核手無膚持置官省曹今喜生  
都下薦酒壓葡萄初聞帝苑夸又復主第褒累累誰採  
掇玉椀上金黿金黿文章宗分贈我已叨豈無異鄉感  
感此微物遭一世走塵土鬢顛得霜毛

陸子履示秦篆寶

其文曰二十六年皇帝盡并兼天下諸侯黔首大安號為皇帝

乃詔丞相斯館法度量則不一嫌疑者皆明一之

秦既并諸侯斯乃一度量鑄寶以永傳萬世俾勿喪精  
銅不生花小篆著丞相一沒咸陽宮千秋事更王陸君  
居洛城客有來渭上曰因農人耕發壞破古藏遂獲此  
物還文完字何壯始號為皇帝立語已超曠意將愚黔  
首繫起危博浪其後同玉璽不隨驪山葬今蓄於君家  
徒爾資奇尚物以用為珍異時皆似妄

聽文都知吹簫

晏虞部遣  
求一見之

虞舜已去蒼梧野秦女驂鸞無復下簫管人間不解傳  
帝樂部中能亦寡欲買小鬟試教之教坊供奉誰知者  
晏識文公始致來勸接賤生宜強且乃呼側坐吹一曲  
驚顧頓嘶堂下馬吾妻閨中聞不聞稚女扳簾笑嬌妩  
未敢多聽便遣還贈飲單盃向身瀉

依韻和永叔久在病告近方赴直道懷見寄二章

浴堂溪殿近皇居秋夕詞臣直宿初宮女穿針爭落月

官奴持燭看殘書萬家乞巧心無盡斜漢飛光望有餘  
枕上江山夢猶熟五更寒雨過簾疎

玉轡瓏瓏出絳宮青槐馳道曉烟中塵頭尚裛洗車雨  
馬耳前趨吹鬣風聞說自將身許國不須仍以醉為公  
我今才薄都無用六十棲棲未歎窮

哭孫明復殿丞

自古春秋學皆知不可過生前恩禮少歿後薦章多妻  
子將焉託田園有幾何汶陽秋樹裏黃鳥漫聽歌

依韻和永叔秋日東城郊行

郊原物老莽然中，寓興驅車向國東。  
夾道名園迷屈曲，壓枝秋實亂青紅。  
寒畦覆綠將收菜，野蝶雙飛尚繞叢。  
田父欣來問行幸，依稀還似鬪鷄翁。

和楊直講夾竹花圖

桃花天紅竹淨綠，春風相間連溪谷。  
花留蜂蝶竹有禽，三月江南看不足。  
徐熙下筆能逼真，蛩素畫成纔六幅。  
萼繁葉密有向背，枝瘦節疎有直曲。  
年深粉剝見墨縱。

描寫工夫始驚俗從初李氏國破亡圖書散入公侯族  
公侯三世多衰微竊貿檐頭由婢僕太學楊君固甚貧  
直緣識別爭來鬻胡質綈袍暮質琴不憂明日鎔無粥  
裝成如得驪領珠誰能更問龍牙軸竹真似竹桃似桃  
不待生春長在日

觀韓玉汝北人貢奉圖

時世重古不重新破圖誰畫舊北人臂鷹捧盤犀利水  
鐵鎖獅子同麒麟翹翹雉尾挿頭上深目鉅鼻青搭巾

塗朱點綠筆畫大筋骨怒露蠻祠神茜袍白馬韓公子  
從何得此來秘珍定應海客遠為贈中國未覩難擬倫  
公子自言吳生筆吳筆精勁瘦且勻我恐非是不敢贊  
退歸書此任從嗔

依韻和永叔戲作

琵琶轉撥聲繁促學作饑禽啄寒木木蠹生蟲細穴深  
長啄敲鏗未充腹攏弦疊響入衆耳發自深林答空谷  
上弦急逼下弦清正如螳螂捕蟬聲坐中賓歡呼酒飲



門外客疑將欲行主人語客客莫去彈到古樹裂丁丁  
內賓外客曾未聽乍聞此曲無不驚還憶昭君入殊域  
烏孫帳下邊馬鳴安知如今有樂事能使女奚飛玉觥  
女奚年小殊流俗十月單衣體生粟言事關西楊廣文  
廣文空腹貪教曲曲奇譜新偷法部妙在取音時轉軸  
翰林先生多所知又笑畫圖收滿屋不肯那錢買珠翠  
任從堆挿堦前菊功曹時借乃許出他日求觀龜殼縮  
我嗟老鈍不如渠幸得交朋時借娛但樂休計有與無

得王介甫常州書

斜封一幅竹牒紙上有文字十七行字如瘦棘攢黑刺  
文如溫玉爛虹光別時春風吹榆莢及此已變蒹葭霜  
道途與弟奉親樂後各失子懷悲傷到郡紛然因事物  
舊守數易承蔽藏搜姦證繆若治絮蚤虱盡去煩黷湯  
事成條舉作書尺不肯勞人魚腹將魚沉魚浮任所適  
偶能及我為非常勤勤問我詩小傳國風纔畢葛屨章  
昔時許我到聖處且避俗子多形相未即寄去慎勿怪

他時不惜傾箱囊知君亦欲此從事君智自可施廟堂  
何故區區守黃卷蠹魚尚耻親芸香我今正值鴈南翔  
報書與君倒肺腸直須趁此筋力强炊粳烹鱸加桂薑  
洞庭綠橘包甘漿舊楚黃橙綿作瓢東山故游攜舞娘  
不飲學舉黃金觴豁如菴畫水泱泱刺船靜入白鷺傍  
菱葉已枯鏡面涼月色飛上白石牀坐看魚躍散星芒  
左右寂寂夜何長烏樓古曲傳吳王千年萬年歌未央  
莫作腐儒針膏肓莫作健吏繩餓狼儻如龔遂勸農桑

儻如黃霸致鳳皇來不來亦莫愛嘉祥

得雷太簡自製蒙頂茶

陸羽舊茶經一意重蒙頂此來唯建溪團片敲湯餅顧  
渚及陽羨又復下越茗近來江國人鷹爪夸雙井凡令  
天下品非此不覽省蜀芽久無味聲名漫馳騁因雷與  
改造帶露摘牙穎自煮至揉焙入碾只俄頃湯嫩乳花  
浮香新舌甘永初分翰林公豈數博士冷醉來不知惜  
悔許已向醒重思朋友義果決在勇猛倏然乃以贈蠟

囊收細梗吁嗟若與鞭二物誠不幸我貧事事無得之  
似贅癭

江鄰幾暫來相見去後戲寄

低頭拜我蒼髯翁來如飛鳥去如風一夕共飲斗柄北  
平明已向函關東衆中舊騎跋鼉馬塞下新買連錢驄  
疾驅似逐鄧林日不肯暫住行何窮

和韓欽聖學士襄陽聞喜亭

亭欄下望漢江水淨綠無風寫鏡明日脚穿雲射洲影

槎頭擺子出潭聲  
檣帆落處遠鄉思  
砧杵動時歸客情  
使者徘徊有佳興  
高吟不減謝宣城

覽顯忠上人詩

昔讀遠公傳  
頗聞高行僧  
廬山將欲雪  
瀑布結成冰  
尋蹟數百載  
歷危千萬層  
師來笑賈島  
只解詠嘉陵

依韻和永叔嘗新茶雜言

自從陸羽生人間  
人間相學事春茶  
當時採摘未甚盛  
或有高士燒竹煮泉為世誇  
入山乘露掇嫩蒿  
林下不

畏虎與蛇近年建安所出勝天下貴賤求呀呀東溪北  
苑供御餘王家葉家長白芽造成小餅若帶銛鬬浮鬬  
色頂夷華味久迴甘竟日在不比苦硬令舌窄此等莫  
與北俗道只解白土和脂麻歐陽翰林最別識品第高  
下無歆斜晴明開軒碾雪末衆客共賞皆稱嘉建安太  
守置書角青翦包封來海涯清明纔過已到此正見洛  
陽人寄花兔毛紫盞自相稱清泉不必求蝦蟇石餅煎  
湯銀梗打粟粒鋪面人驚嗟詩腸久饑不禁力一吸入

腹鳴伊哇

次韻再和

建溪茗株成大樹頗殊楚越所種茶先春喊山摘白萼  
亦異烏紫蜀客誇烹新鬪硬要咬盞不同飲酒爭畫蛇  
從揀至碾用盡力只取勝負相笑呀誰傳雙井與日鑄  
終是品格稱草芽歐陽翰林百事得精妙官職況已登  
清華昔得隴西大銅碾碾多歲久深且窳昨日寄來新  
纔片包以篠筠纏以麻唯能賸啜任腹冷幸免醅酎冠



弁斜人言飲多頭顛挑自欲清醒氣味嘉此病雖得優  
醉者醉來顛踣禍莫涯不願清風生兩腋但願對竹兼  
對花還思退之在南方嘗說稍稍能嚼墓古之賢人尚  
若此我今貧陋休相嗟公不遺舊許頻往何必絲管喧  
咬哇

送葛都官南歸

不羨新為赤縣尹惟羨暫向江南歸江南暮暮梅雨時  
風帆差差並鳥飛罾竿夾岸長若挽水籠畜魚鮮且肥

家在千山古溪上先應喜鵲噪門扉

永叔內翰見索謝公游嵩書感歎希深師魯子聰  
幾道皆為異物獨公與余二人在因作五言以  
叙之

昔在洛陽時共游銅駝陌尋花不見人前代公侯宅深  
堂鏤塵埃空壁闢蜥蜴楸陰布苔綠野蔓纏石碧池魚  
有偷釣林鳥有巧射園隸見我來朱門暫開闢園婦見  
我還便掃車馬跡何以掃馬跡實亦畏他客我輩唯適

情一葉未嘗摘他人或所至生菓不得惜入憶游嵩山  
勝趣無不索各具一壺酒各蠟一雙屐登危相扶牽遇  
平相笑噓石搥雲衣輕巖裂天窗窄上飲醒心泉高顛  
溜寒液下看峰半雨廣甸飛甘澤夜宿岳頂寺明日入  
戶白分吟露氣冷猛酌面易赤明朝循歸途兩脰痛苦  
刺日旰就馬乘香草路迫阮却望峻極居已與天外隔  
薄暮投少林漱濯整冠幘碑觀巡幸僧指古定空壁誓  
將新詠章燈前互詆擿楊生護已短一字不肯易明年

移河陽簿書日堆積忽得謝公書大夸遊覽劇自高歷  
石堂鮮花題洞額其文曰神清固非人筆畫乃知二公  
貴逆告意可蹟遂由龍門歸里堠環數驛我時詩已答  
或歌或辨責責我不喜僧性實未所獲凡今三十年累  
塚拱松栢唯公與非才同在不同昔昔日同少壯今且  
異肥瘠昔日同微祿今且異烜赫昔同騎破韉今控銀  
轡革昔同自謳歌今執樂指百死者誠可悲存者獨窮  
厄但比死者優貧存何所益

次韻和吳仲庶舍人送德化郭尉

蒲葉高帆十二幅，秋風逆水蒲檣開。  
是時不畏浪頭起，到日定將船尾堆。  
用舍東方言虎鼠，賤疎梅福比蒿萊。  
少年才辨無如美廬岳峰前，莫滯迴。

和韻答永叔洗兒歌

夜夢有人衣帔蜺，水邊授我萬龜兒。

生男前一夕夢道士贈龜一枚仰

看星宿正離離，玉魁東指生斗威。  
明朝我婦忽在蓐，乃生男子實秀眉。  
自磨丹砂調白蜜，辟惡辟邪無寶辟。  
我

慚暮年又舉息不可不令朋友知開封大尹憐最厚持  
酒作歌來慶之畫盆香水洗且喜老駒未必能千里盧  
仝一生常困窮亦有添丁是其子

送余少卿知睦州

青山峽裏桐廬郡七里灘頭太守船雲霧未開藏宿鳥  
坡原將近見燒田養茶摘藥新春後種橘收包小雪前  
民事蕭條官政簡家書時問雪溪邊

田家

草木遶籬盛田園向郭斜去鋤南山豆歸灌東園瓜白  
水照茅屋清風生稻花前陂日已晚聒聒競鳴蛙

歐陽寺丞桐城宰

葉落淮南樹青山徧馬頭人煙將近郭松竹不知秋夜  
虎林間嘯溪泉舍下流門前仲卿廟遺跡待君求

朱邑  
冢祠

在  
馬

餘姚陳寺丞

試邑來勾越風煙復上游江潮自迎客山月亦隨舟海

貨通閭市漁歌入縣樓絃琴無外事坐見浦帆收

任適尉烏程

俛作程鄉尉折腰還自甘卞峰晴照黛雲水曉澄藍封  
上春田闢蘆中走吏參到時蘋葉長柳惲蓋江南

夏日晚霽與崔子登周襄故城

雨脚收不盡斜陽半古城獨攜幽客步閒閱老農耕寶  
氣無人發陰蟲入夜鳴余非避喧者坐愛遠風清

西湖閒望



夏景已多趣湖邊日更佳園葵雜紅紫岸柳自欹斜雨  
氣收林表城陰接水涯愛間輸白鳥盡日立汀沙

金山寺

并序

昔嘗聞謝紫微言金山之勝峰壑攢水上秀拔殊衆  
山環以臺殿高下隨勢向使善工摸畫不能盡其美  
初恨未遊赴官吳興船次瓜洲值海汐冬落孤港未  
通獨行江際始見故所聞金山者與謝公之說無異  
也因借小舟以往乃陟迴閣上上方歷絕頂以問山

阿危亭曲軒窮極山水之趣一草一木雖未萼發而  
或青或凋皆森植可愛東小峰謂之鵲山有海鵲雄  
雌棲其上每歲生雛羽翮既成與之縱飛迷而後返  
有年矣惡禽猛鷲不敢來茲以搏魚鳥其亦不取近  
山之物以為食可義也夫薄暮返舟寺僧乞詩強為  
之句以應其請偶然而來不得髣髴敢與前賢名迹  
耶

吳客獨來後楚橈歸夕曛山形無地接寺界與波分巢

鶻寧窺物馴鷗自作羣老僧忘歲月石上看江雲

舟中值雨裴刁二君相與見過

江上滄淒淒天形接野低岸痕生舊水馬跡踏春泥風  
急侵衣重山昏卷幔迷誰驚二客論不愧巨源妻

題刁經臣山居時已應辟西幙

向不樂郡府遂去歸田園結廬復種菰草樹日已繁散  
帙理舊學了然無俗喧春雨一迴過覽耕登古原青山  
每自愛齊色當衡門故人苟來往名宦未嘗言趣適已

不淺道心良亦存忽聞辟書至便令驅犢轅豈期同瓠  
瓜長繫蒿萊根始知古君子出處惟義敦

依韻和武平九月十五日夜北樓望太湖

東吳臨海若看月上青冥河漢微分練星晨淡布螢細  
煙沉遠水重露裛空庭孤坐饒清興惟將影對形

寄西京通判宋次道學士

當時交友都無幾欲問歡娛亦異今花接上林新木變  
水分清洛舊池深嵯峨嵩色雲常在窈窕宮牆草又侵

脩竹千竿白家寺昔年題處可能尋

送余中舍知漢州德陽

匹馬易為秣單車長足輕秋風來棧道宿雨度關城石  
上樹林暗山根江水明桐花鳳何似歸日為將行

郭之美忽至云往河北謁歐陽永叔沈子山

春風無行迹似與草木期高低新萌芽閉戶我未知忽  
聞人扣門手把蟠桃枝問我此蟠桃緣何結子遲但笑  
不復答問者當自推振衣向河朔河朔人偉期以茲不

答意遜子北歸時

樞澗晝夢

誰謂死無知每出輒來夢豈其憂在途似亦會相送初  
看不異昔及寤始悲痛人間轉面非清魂歿猶共

靈樹鋪夕夢

晝夢同坐偶夕夢立我左自置五色絲色透練囊過意  
在畱補綴恐衣或綻破歿仍憂我身使存心得墮

夕發陽翟

我行陽翟道暮雨原上急麒麟冢相望霹靂碑下立農  
耕傍山去鬼火迸林入莫問泉下人馬墮衣更濕

缺月

缺月來照屋角時西家狗吠東家疑夜深精靈鬼物動  
僊宰古莽無風吹

會勝院沃洲亭

前溪來洲後溪濶風吹細浪龍鱗活孤亭一入野氣深  
松上藤蘿籬上葛葛花葛蔓無斷時女蘿莫翦連古枝

當年吾叔讀書處  
夜夜濕螢來復去

題松林院

靜邃無塵地  
青燐續燭燈  
木魚傳飯鼓  
山衲見歸僧  
野色寒多霧  
溪痕夜閣冰  
吾非謝康樂  
獨往亦何能

讀月石屏詩

余觀二人作詩論月石  
月在天  
石在山  
下安得石上  
有月蹟  
至矣歐陽公知不可詰  
不竟述欲使來者默自  
釋蘇子苦豪邁何用強引  
屏角蚌蛤巧擬析屏蛤動活



有情想石無情想已非的吾謂此石之蹟雖似月不能  
行天成紀厯曾無纖毫光不若燈照夕徒為頑璞一片  
圓溫潤又不似圭璧乃有桂樹獨扶疎常娥玉兔了莫  
覓無此等物豈可靈祇以為屏安足惜吾嗟才薄不復  
詠略評二詩庶有益

齊國大長公主挽詞

賢行聞當世尊隆異故常每令夫結友不為子求郎夜  
月初沉海姑星忽隕潢臨門親祖祭悲吹起修岡

重過瓜步山

魏武敗亡歸孤軍處山頂雖憐江上浦  
鑿巖山巔井豈是欲勞兵防患在萌穎  
我昔常登臨徘徊愛晴景片雨西北來  
風雷變俄頃疾行下危磴屢脫不及整  
霑濡入舟中幼子喜抱頸問我適何之  
衣濕不太冷昨暮泊共陽月黑夜正永  
鴈從沙際鳴旅枕自耿耿平明夾櫓去  
廟樹聳寒嶺舉首生白雲飄搖水中影

秋日村行

谿霧晝又收山村夜初晦  
饑禽來往飛遠樹青紅碎  
原上楚牛童屋頭吳婦碓  
雞肥酒已熟野老邀同輩

暝

杳杳鐘初發昏昏戶閉時  
巢禽投樹盡疲馬入城遲  
醉唱眠茅屋燒光透槿籬  
荷鋤休帶月亭長豎毛眉

直宿廣文舍下

前夜宿廣文葉響竹打雪  
昨夜宿廣文窗影竹照月  
賴此數竿竹與我為煖熱  
上有寒鵲棲拳足如瘦蕨  
平明

欲飛去惜惜若告說我無喜可報煩爾弄背舌亦嘗苦  
老鴟鳴噪每切切為學本為道窮感令素髮但能得酒  
飲終日自兀兀

送唐紫微知蘇臺


洞庭五月水生寒盧橘楊梅已滿盤  
秦伯廟前看走馬闔閭城下見駉鸞  
吳娃結束迎新守府吏趨鏘拜上官  
曾過揚州能慣否劉郎盞底勸須寬

送鮮于祕丞

仇

通判黔州

壺頭山下俗巴婦曲中聽汲井熬鹽白燒田種穀青巖  
風來虎嘯江雨過龍腥事簡能談者揚雄所草經



宋詩鈔卷九

欽定四庫全書

集部

宋詩鈔卷十一

詳校官中書臣賈鉞

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷十

內閣中書舍人吳之振編

余靖武溪詩鈔

余靖字安道韶州曲江人舉進士與尹師魯同應拔  
萃科靖為冠累官至秘書丞充集賢校理天章閣待  
制時范仲淹以言事觸宰相得罪靖疏救之坐貶監  
筠州酒稅已仲淹得白乃召還慶厯中夏元昊納誓



請和將加冊封而契丹兵來止毋與和朝議患之靖  
謂撓我爾不可聽乃假靖諫議大夫報契丹于九十  
九泉卒屈其議取其要領而還加知制誥史館脩撰  
時相忌之坐習蕃語出知吉州奪官皇祐初復起平  
儂智高于嶺南拜集賢學士遷吏部侍郎交趾寇邕  
州以為廣西體量安撫使靖往移檄而定拜工部尚  
書始興郡開國公食邑二千八百戶實封二百戶代  
還道病卒累贈少師諡曰襄有武溪集二十卷為文

不為曼辭如辯論史序潮等篇皆有所發明詩亦  
堅鍊有法時歐陽變體復古靖與交厚故亦棄華取  
質為有本之學

送陳京廷評

曲江居嶺阨楚越封壇間去異時置治官歲入不盈萬

將漕擇材能招徠委成算扇橐大野烘鑿礦重崖斷閩  
吳荆廣人奔走通昏旦千夫即山鑄畢給未酬半三監  
居江湄僦輦日充羨地官奏計最遂為天下冠嘗聞卜

大夫名聲傳史漢素履騁脩程逸足何由絆

夏日江行

解組趨宸闕扁舟泛江練健鶻鴈齊鳴輕帆雲一片水  
濶煙難收雨昏風易轉曲浦逗留多脩程夢魂倦舟子  
怯風波終朝股交戰預憂雷電驚先喜虹蜺斷安知農  
夫望只顧行人便愚儒有所思自愧心如面追惟亡異  
才承恩得為縣盤錯非所長耕桑當勉勸十日愆一雨  
灾恐延農畔靡愛幣與牲羣望走之徧山川未應誠兼

晨不敢飯霈然得嘉澍荷天知免譴何以迅流間遽逐  
庸夫變江淮民薦饑糟糠未充膳粢盛苟無害豈將風  
雨怨玉燭長均調寸進真君願

過大孤山

有形天地分設險山河壯孤山鎮南服  
我我楚之望中立亡所倚屹然怪其狀  
石參入春空翠柱楮秋浪片時起雪痕  
萬頃排霜杖噫氣專吸呼橫流以溟漲  
行人多躁進那解明得喪不顧風濤險  
半就江魚葬掛席經典

翫往往乞靈貺遂因孤獨名塑立輕盈像綽約姑射姿  
夢魂巫峽想如何方面祠終古承其妄五岳視三公降  
殺不過兩不然為子男何以通祀享四氣均分風條融  
各有掌避其狂怒勢亦可利攸往亭育天地心憑險恣  
沈湍正直鬼神德非名奚獨饗不使悔吝侵庶幾忠信  
仗在人不在神勿為虛稽顙

寄題田待制廣州西園

善政偏脩舉增完池館清地含春氣早月映暮潮生石

有羣星象

庭除羅立舊  
名九曜石

花多外國名

異花皆舶上所  
來嶺北無之

與

民同雉兔邀客醉蓬瀛翰墨資吟興雲泉適野情鎮應  
持左蠨快欲鱸長鯨積霽藏樓閣馴鷗識旆旌甘棠留  
美蔭高倚越王城

寄題廣州田諫議頤堂

退食公堂暇應無俗慮侵簾開雙燕影吏散百花陰海  
域逍遙境榮途淡泊心政成先養正惠愛及民浚

題劉太博樓心亭

宏構小侯第避權長掩關地分金穴貴人共白雲閒野  
色春牆外池香暮雨間燕申忘萬慮吏隱敵箕山

留題龍光禪刹呈周長老

尋幽逢勝地方外趣無垠雙澗流寒月千峰積暮雲路  
盤塵境斷世系祖燈分却愧留題處猶須說見聞

留題澄虛亭

湖光湛寒碧簾影拂莓苔魚戲應同樂鷗閒亦自來雨  
餘輕靄合竹外雜花開久欲留詩去慚無綺靡才

送李廷評知福清縣

世閥茂儒紳閩甌寵命新  
縣圖遙盡海鄉樹密藏春  
祖帳驚將老登車雉已馴  
行聞趨召節舊美政如神

子規

一叫一春殘聲聲萬古冤  
踈烟明月樹微雨落花村  
易墮將乾淚能傷欲斷魂  
名韉慚自束為爾憶家園

桂園早行

聞鷄已行邁策馬更徘徊  
月色依山盡秋聲帶雨來自



堪悲玉璞誰復築金臺薄宦空羈東西齋長絳苔

山館

野館蕭條晚憑軒對竹扉樹藏秋色老禽帶夕陽歸遠  
岫穿雲翠畝田得雨肥淵明誰送酒殘菊遠墻飛

晚至松門僧舍懷寄李太祝

日暮倦行役解鞍初息肩霧昏臨水寺風勁欲霜天蓼  
浦初聞鴈人家半在船思君正怊悵黃葉更翩翩

遊水南寺

雙刹聳浮雲層軒絕世塵松溪千蓋雨茶圃一旗春夜  
梵龕燈暗朝香篆火新暫來猶永日堪羨白蓮人

暮春

草帶全鋪翠花房半墜紅農家榆莢雨江國鯉魚風堤  
柳綿爭撲山櫻火共烘長安少年客不信有衰翁

宿山觀

孤枕秋宵永山寒夢不成殘燈背窗影急雨帶溪聲未  
分山中老空思日下名區區如逆旅此際若為情

送岳師歸潁川

千里起歸思，倏然物外身。  
海山經處霧，梅嶺到時春。  
藥更開新楮，庭應長舊筠。  
年衰重方術，聊此送行人。

山寺獨宿

柴車走縣封，窮途秋耿耿。  
急雨失溪聲，殘燈淡窗影。  
驅馳下士身，淒涼旅人景。  
山寒夢難成，始識今夜永。

送任祕丞知長興縣

懿文通識氣，飄飄二十年。  
來困下僚吾道本，將忠許國

世途休嘆老登朝  
囊裝冷落堆青簡  
衙署幽深枕畫橋  
預想吳人蒙美化  
海鷗桑雉共逍遙

又和寄提刑太保

常記臨歧把酒盃  
芳心應得見歸來  
不從去日丁寧約  
已向東風取次開  
清燕固難停燭待  
雕鞍須是著鞭催  
欄邊殘豔猶堪賞  
莫使韶光過了回

和伯恭自造新茶

郡庭無事即仙家  
野圃栽成紫筍茶  
踈雨半晴回暖氣

輕雷初過得新芽  
烘褫精謹松齋靜  
採擷縈迂澗路斜  
江水對煎萍髮鬢  
越甌新試雪交加  
一槍試焙春尤早  
三盞搜腸句更嘉  
多謝彩箋貽雅贐  
想資詩筆思無涯  
送張如京知安肅軍

賜戟銜恩出斗城  
塞門迢遞草初青  
新提司馬臨戎節  
舊應衣烏近極星  
叔子戍吳長緩帶  
單于歸漢已空庭  
圯橋自得家傳策  
不問人間太白經

送劉學士知衡州

朱轡新命漢諸侯地扼荆湘占上游醺淥水聲侵古堞  
祝融峯色入晴樓晝垂三組鄉粉過春擁雙旌獄寺游  
番直星垣歸緩步謫仙通籍著瀛州

送蓋太博通判定州

都部署  
奏請

墨詔殷勤擢俊賢精求毗佐四方翰封疆謹守盧龍塞  
旌旆仍親上將壇衰草帶霜秋馬健黃雲遮日暮城寒  
燕南趙北邊之要旅拒憑君一策安

竊聞集賢侍郎政成公暇時出游覽因念青社境

物之勝長句四韻奉寄觀文殿大學士戶部侍郎定州路安撫使兼知定州龐籍上

政報公餘稱雅懷兩城烟樹盡樓臺波通龍口春戲盛

今州廣固通五龍口

雲入山門曉望開

劈頭山一名大雲門

園館有詩書命

筆海邦無寇破蠻才當時不俟交符印恨失嵐亭展讌

壘

到塞後有懷青社詩今錄呈

初到營陵春始回泱泱風物接梧臺魚鹽利重通關盛筭

瑟聲和讌席開天際膚雲連岱色海中靈藥慕仙才早  
知未許身閒去悔捨堯山石澗來

並青州遊  
賞最勝處

觀文相公以靖叅承善政特寄嘉篇謹依嚴韻和  
訓

幸奉前規盡所懷閒身吏隱裕春臺山迴翠幌憑欄見  
花簇紅房遠郭開

青州紅牡丹洛下有  
名南城花園尤盛

愛樹細民思美

化續貂孤跡愧非才南河舊事依然在楔飲杯盤耻畫

疊



和董職方見示初到番禺詩

五方殊俗古難并千載猶存故越城

今子城及東有故壘俗號趙陀城

客聽潮鷄迷早夜

三更潮上即雞鳴

人瞻颶母識陰晴

颶風欲至西黑

雲起謂之颶母

波濤洶湧天邊濶犀象欄塼徼外生太守不才

當遠寄惟憂南畝廢農耕

遊應聖宮

驅羸遠出嚴闔雲構祠宮絕世塵伴鶴不知龜甲子  
斷山多見藥君臣雨昏仙穴丹砂井雲映樓居玉洞人

只待策勲書竹帛抽簪來此卜比鄰

西山

萬壑千巖鬪物華  
檣節閒訪道生涯  
一壇星斗脩真館  
數里雲烟斷藥家  
魚戲竹溪寒影碎  
路穿松塢翠陰斜  
桃源自有神仙宅  
未信明河八月槎

賀孫抗員外春晝端居

萬事皆從適意休  
何須快馬騁長楸  
高人鼓吹鳴哇地  
當世神仙笑甃樓  
燕到捲簾如舊分  
花開逢雨最閒愁

僧來便學嘗茶訣白乳槍旗帶露收

謝孫抗員外惠酒

白衣遠遠到江樓報道攜壺助勝遊  
醉眼便堪終日富離腸先破一春愁  
梅梢背嶺開猶晚雪片當風舞未休  
此景滿腸方得意不須千釀敵封侯

馬當呼鷗不至偶成呈同行諸官

昔年曾泛馬當灣團飯喚鷗篙楫間  
今日江頭飛不下應知人世足機關

再簡伯恭

十載京華九日期帝家園苑醉金卮今朝郭外尋僧話  
坐聽寒泉遶竹籬

端午日寄酒度回都官

龍舟爭快楚江濱弔屈誰知特愴神家釀寄君須醕酹  
古今嫌見獨醒人

五色雀

羅浮有五色雀各被方色非時不見若士大夫將遊

是山則先入羣翔寺僧以是為候某庚辰歲謫官來  
遊將至之夕茲雀亦集感之成詠云

五方純色儼衣冠

尤可愛者朱藍  
正色若朝服焉

應是山靈寄羽翰多

謝相逢殊俗眼謫官猶作貴人看

曲江津亭謁華嚴長老見所賜御書因成二韻

數年不侍玉爐傍夢斷千山隔帝鄉今日見師堪下淚  
御書開卷帶天香

重遊英州碧落洞

幽景前賢恨到難  
泉聲清淺出巖間  
區區宦路重來此

往歲征蠻  
廣州罷任

塵世難逢特地間

宋詩鈔卷十